

চর্যাপদ : নামকরণ পর্যালোচনা

ড. সুজিত কুমার পাল

অধ্যাপক, বাংলা বিভাগ, বিদ্যাসাগর বিশ্ববিদ্যালয়, পঃ বঃ।

প্রবন্ধসার

কোন একটি গ্রন্থ নিয়ে যদি সর্বাধিক বিতর্ক ভারতে আধুনিককালে তৈরি হয়ে থাকে, তবে তা চর্যাপদ-এর ভাষা থেকে শুরু করে সাহিত্যিক দাবীদার হয়েছে পূর্বভারতীয় অনেক ভাষা। এসবের থেকেও কম চর্চা হয়নি-এর নামকরণ বিষয়ে। আবিষ্কারক হরপ্রসাদ শাস্ত্রীর প্রদত্ত নামের সঙ্গে মিলিয়ে মুণ্ডিদের টীকা ইত্যাদি প্রসঙ্গ এবং তি বতীয়া অনুবাদ প্রভৃতি মিলেমিশে ‘চর্যাপদ’-এর নামকরণ প্রসঙ্গটি বেশ জটীলাকার নিয়েছে। আমাদের বর্তমান আলোচনায় চর্যাপদের নামকরণ নিয়ে এযাবৎকালের প্রধান প্রধান আলোচনার ধারাপথটি দেখানো হল। প্রতিক্ষেত্রে অবশ্য কতকগুলি যুক্তির মানদণ্ড দিয়ে বিচার করার প্রয়াস দেখিয়েছেন গবেষকগণ। আমাদের এই নামকরণ বিতর্ক প্রসঙ্গ ভাবী চর্যাপদ-গবেষকদের সহায়ক হতে পারে।

চর্যাপদ বাংলা ভাষা ও সাহিত্যের অমূল্য সম্পদ। চর্যাপদকে নিয়ে বাঙালির গর্বের অন্ত নেই। বাংলাদেশের মানুষ তথা সমগ্র বাঙালির জীবনচর্যা এর মধ্যে ধরা পড়েছে। কি সাহিত্য, কি ধর্ম দর্শন, কি সঙ্গীত, কি প্রকৃতিভাবনা, ভাষা ভাবনা, মানব ভাবনা, সবক্ষেত্রেই সমকালীন জীবনকথায় সমৃদ্ধ হয়েছে চর্যাপদ। আজ বাংলা সাহিত্য ও ভাষার নানাদিক থেকে বৈচিত্র্য আছে। কিন্তু চর্যাপদ বাংলা ভাষার প্রথম নিদর্শন হয়েও এর বৈচিত্র্য সর্বক্ষেত্রে গ্রহণযোগ্য। এমনভাবে সর্বক্ষেত্রে সাফল্যের নজির বাংলা ভাষায় প্রায় নেই বললেই চলে।

চর্যাপদ বাঙালির লেখা নয়। অথচ বাংলা ভাষার ও সাহিত্যের উল্লেখযোগ্য নিদর্শন। ভাবতে আশ্চর্য লাগলেও এটাই সত্য। অথচ এই পদগুলি বৌদ্ধ সহজিয়া সাধকদের সাধনপ্রণালী হিসেবেই রচনা করা হয়েছিল। তাহলে দেখা যাচ্ছে বৌদ্ধদের নিজস্ব সৃষ্টি এই পদগুলি। অথচ বাঙালিদের জীবনচর্যায় পরিপূর্ণ পদগুলি। তবে বাঙালি জীবনচর্যা থাকলেও বৌদ্ধদের ভাবনায় সমৃদ্ধ হয়েছে পদগুলি। এককথায় দেখা যায় বাঙালি ও বৌদ্ধ সংস্কৃতির অপূর্ব সংমিশ্রণ এখানে ঘটেছে। কারণ এই পদের অন্যতম কবি ভুসুকপাদের রচনায় বাঙালি

ভাবনা ও সংস্কৃতির বেশকিছু উল্লেখযোগ্য নিদর্শন পাওয়া যায়। কবি নিজে থেকেও এক সময় বাঙালি সংস্কৃতির সঙ্গে মিশিয়ে বলেছিলেন—

“বাজ গাব পাড়ী পঁউয়া কালোঁ বাহিউ

অদঅবঙ্গালে ক্লেস লুডিউ।।

আজি ভুসুবঙ্গালী উইলী

গিঅ ঘরিণী চণ্ডালী লেলী।।”^১

এ থেকেই বোঝা যায় বাঙালি ভাবনা ও সংস্কৃতি পদ সৃষ্টির ক্ষেত্রে বেশ কার্যকরী হয়েছিল। অনেকক্ষেত্রে মনে হয় এই বাবনা থেকেও চর্যাপদ যে বাংলা ভাষার সম্পদ তা প্রমাণ করতে সহায়তা করেছে। গ্রন্থের ভূমিকায় হরপ্রসাদ শাস্ত্রী বলেছেন— “১৯০৭ সালে আবার নেপালে গিয়া আমি কয়েকখানি পুঁথি দেখিতে পাইলাম। একখানির নাম ‘চর্য্যচর্য্য - বিনিশ্চয়, উহাতে কতকগুলি কীর্তনের গান আছে ও তাহার সংস্কৃত টীকা আছে। গানগুলি বৈষ্ণবদের কীর্তনের মত, গানের নাম ‘চর্য্যাপদ’। আর একখানি পুস্তক পাইলাম - তাহাও দৌঁহাকোষ, গ্রন্থকারের নাম সরোরহবজ্জ, টীকাটি সংস্কৃতে, টীকাকারের নাম অদয়বজ্জ। আরও একখানি পুস্তক পাইলাম, তাহার নামও দৌঁহাকোষ, গ্রন্থকারের নাম কৃষ্ণাচার্য্য, উহারও একটি সংস্কৃত টীকা আছে। ...

আমার বিশ্বাস, যাঁরা এই ভাষা লিখিয়াছেন, তাঁরা বাঙ্গালা ও তন্নিকটবর্তী দেশের লোক। অনেকে যে বাঙালী ছিলেন, তাহার প্রমাণও পাওয়া গিয়াছে। যদিও অনেকের ভাষায় একটু একটু ব্যাকরণের প্রভেদ আছে, তথাপি সমস্তই বাঙ্গালা বলিয়া বোধ হয়।^{১১} এইভাবে বাঙালিয়ানার প্রমাণ বিভিন্ন সূত্রে চর্যাপদ সম্পর্কে পাওয়া যায়।

চর্যাপদের নামকরণের ক্ষেত্রে নানা ভাবনা কাজ করেছে। মোটামুটিভাবে বলা যায় ১৯০৭ সালের আগে পর্যন্ত বাংলা ভাষা ও সাহিত্যের এমন সম্পদের কথা কেউ জানতেন না। তুর্কী রাজত্বের পরবর্তী সময়ে নেপাল বৌদ্ধদের প্রদান আশ্রয়স্থল ছিল। হরপ্রসাদ শাস্ত্রী সেই ভেবে বাংলা পুথির সন্ধানে একাদিকবার নেপালে যান। ১৮৯৭-৯৮ সালে তিনি দুবার নেপালে গিয়ে কয়েকটি সংস্কৃত পুথি উদ্ধার করেন। তা দেখে তাঁর মনে হয় বাংলায় ধর্মঠাকুরের পুথিপত্রে বৌদ্ধধর্মের যে লক্ষণ রয়েছে নেপালে বৌদ্ধধর্মের সুবিস্তৃত সংস্করণ থাকতে পারে। এই ধারণা থেকেই নেপাল থেকে ফিরে তিনি ‘Discovery of Living Buddhism in Bengali’ নামে গ্রন্থ লিখে বাংলায় বৌদ্ধধর্মের নিদর্শন ও ভাবনা প্রকাশ করেন। এই ভাবনা থেকেই ১৯০৭ সালে তিনি আবার নেপালে যান। সেইসময় তিনি নেপালের রাজ দরবারের গ্রন্থাগার থেকে চর্যাপদের বেশকিছু পদ উদ্ধার করেন, সেই সময় তিনি জানতেন না এই পদগুলি আসলে কোন ধরনের পদ বা কোন ভাষায় লেখা। তাই দীর্ঘ নয় বছর পর ১৯১৬ সালে বঙ্গীয় সাহিত্য পরিষৎ থেকে পদগুলিকে সংকলন করে গ্রন্থাকারে প্রকাশ করেন। ১৯১৬ সাল থেকেই জানা যায় এই গ্রন্থের গুরুত্ব। এই গ্রন্থে ৫০টি পদ সংকলিত হয়েছে। তার মধ্যে ২৩ সংখ্যক পদটি খণ্ডিত, পরবর্তী ২৪ ও ২৫ সংখ্যক পদের পাঠ পাওয়া যায়নি। আবার ৪৮ সংখ্যক পদের পাঠও পাওয়া যায়নি। তাহলে দেখা যাচ্ছে মোট সাড়ে তিনটি পদের পাঠ পাওয়া যায়নি। তাই সাড়ে ছেচল্লিশটি পদের যথার্থ সংকলন

হরপ্রসাদ শাস্ত্রী ‘চর্য্যচর্য-বিনিশ্চয়’-এ করেছিলেন। তবে প্রবোধচন্দ্র বাগচী চর্য্যর যে ত্রিভিত্তি অনুবাদ পেয়েছিলেন তাতে এই কয়েকটি চর্য্যর ত্রিভিত্তি অনুবাদের সম্মান মিলেছে।

চর্য্যপদে মোট ২৩ জন সিদ্ধাচার্যের পদ পাওয়া গিয়েছে। কৃষ্ণাচার্যের পদ সংখ্যা - ১৩, ভুসুকুর - ৮, সরহের, কুঙ্কুরীপাদের-৩, লুই, শবর ও শান্তি প্রত্যেকের ২, এছাড়া অবশিষ্ট সিদ্ধাচার্যগণের ১টি করে পদের উল্লেখ রয়েছে। অবশিষ্ট সিদ্ধাচার্যগণ হলেন আর্যদেব, কঙ্কণপাদ, কাম্বলাশ্বর, গুণুরীপাদ, চাটিলপাদ, ডোম্বীপাদ, চেন্টপাদ, তল্লীপাদ, জয়নন্দী, তাড়কপাদ, দারিকপাদ, গুঞ্জুরীপাদ, বিরূপাদ, বীণাপাদ, ভদ্রপাদ, মহীধরপাদ।

প্রায় এক হাজার বছর পর বাংলা ভাষা ও সাহিত্যের প্রথম নিদর্শন হিসেবে প্রতিপন্ন চর্য্যপদের উদ্ধার হওয়া বাঙালি মানুষের কাছে আশ্চর্য তো বটেই। এত বছর ধরে বাংলা ভাষার নিদর্শন চর্য্যপদ বাংলায় ছিল না। এর আগে পর্যন্ত বাংলা ভাষার প্রথম নিদর্শন সম্পর্কে কেউ জানতেন না। প্রাচীন বাংলা ভাষা ও সাহিত্য বিষয়ে নানা জনের নানা মত ছিল। আচার্য্য সুনীতিকুমার চট্টোপাধ্যায় ভাষার দিক থেকে প্রমাণ করেন এটি প্রাচীন বাংলা ভাষার নিদর্শন হিসেবে সুপ্রযুক্ত। সাহিত্য হিসেবেও এটি প্রাচীন বাংলা সাহিত্য হিসেবেই এখনো পর্যন্ত গ্রহণযোগ্য।

“চর্য্যপদ” আসলে লৌকিক নাম হয়ে গেছে। কারণ হরপ্রসাদ শাস্ত্রী প্রকাশকালের সময় এর নাম দেন ‘চর্য্যচর্য-বিনিশ্চয়’। ১৯১৬ সালে সংকলন গ্রন্থটির নাম দিয়েছিলেন ‘হাজার বছরের পুরাণ বাঙ্গালা ভাষায় বৌদ্ধগান ও দোহা’। এই গ্রন্থে চারটি বিষয় ছিল - ‘চর্য্যচর্য-বিনিশ্চয়’, ‘সরোজবজ্রের দোহাকবচ’, ‘কৃষ্ণাচার্যের দোহাকোষ’, ডাকার্ণব। হরপ্রসাদ শাস্ত্রীর মতে এই চারটি বিষয়ই হাজার বছর আগের সৃষ্টি হিসেবে অনুমিত। আচার্য্য সুনীতিকুমার চট্টোপাধ্যায় ‘The Origin and Development of

the Bengal Language' গ্রন্থে বিশ্লেষণ করে প্রমাণ করেন চর্যাপদের ভাষা বাংলা। সরোজবজ্রের দোহাকোষ ও কৃষ্ণচর্য্যের দোহাকোষের ভাষা পূর্বী অপভ্রংশ আর ডাকার্নবের ভাষা পশ্চিমী অপভ্রংশ। অথচ 'চর্য্যচর্য্য-বিনিশ্চয়' এই নামটির মধ্যে বাঙালি ভাবনা নেই। সংকলক বিভিন্ন বৌদ্ধ গ্রন্থের নাম অনুসরণ করেছিলেন বলে অনুমিত হয়। উদাহরণ হিসেবে বলা যায় সেইসময় বৌদ্ধ ধর্ম গ্রন্থাদি নামকরণের ক্ষেত্রে বিশেষভাবে কিছু শব্দ সজ্জার ব্যবহার ছিল - ইতিবাচক শব্দ+নেতিবাচক শব্দ+বিনিশ্চয়। যেমন আচার্য তেজারির 'ধর্মাদমবিনিশ্চয়', আবার বৌদ্ধ চিকিৎসাশাস্ত্রগ্রন্থের গ্রন্থ 'রুজ্জবিনিশ্চয়', নামের মধ্যে 'বিনিশ্চয়' শব্দের পু.য়োগ লক্ষ করা যায়, অনঙ্গবজ্রের 'প্রজ্ঞোপায়বিনিশ্চয়সিদ্ধি' এ ক্ষেত্রেও উল্লেখ করা যেতে পারে।

'চর্য্যচর্য্য-বিনিশ্চয়' প্রকাশের পর থেকে এ পর্যন্ত চর্য্যপদের বহু গ্রন্থ প্রকাশ হয়েছে। নামকরণ নিয়েও বিভিন্নজনের মত পাওয়া গিয়েছে। সময় অনুসারে এর নাম নিয়ে নানাজন নানা কথা বলেছেন। এবার দেখা যাক এর নাম সঠিকভাবে কোনটা সুপ্রযুক্ত হতে পারে। এ বিষয়ে চর্য্যপদের সুকলন নিয়ে উল্লেখযোগ্য গ্রন্থনাম ও সংকলকদের একটা তালিকা করে নেওয়া যেতে পারে। তারপর নামকরণ বিষয়ে আলোচনায় আসা যেতে পারে।

- ১। চর্য্যাপদ - মণীন্দ্রমোহন বসু - ১৯৪৬
- ২। চর্য্যাগীতিকোষ - ড. প্রবোধচন্দ্র বাগচী ও শান্তিভিক্ষু - ১৯৫৬
- ৩। চর্য্যাগীতি পদাবলী - ড. সুকুমার সেন - ১৯৫৬
- ৪। চর্য্যাগীতি পরিচয় - সত্যব্রত দে - ১৯৬০
- ৫। চর্য্যাপদ - শান্তিরঞ্জন ভৌমিক - ১৯৬১
- ৬। চর্য্যাগীতি - তারাপদ মুখোপাধ্যায় - ১৯৬৫
- ৭। চর্য্যাপদ - অতীন্দ্র মজুমদার - ১৯৬০

- ৮। চর্য্যাগীতি পরিচিতি - এবাদত হোসেন - ১৯৭০
- ৯। চর্য্যাগীতির ভূমিকা - জাহ্নবীকুমার চক্রবর্তী - ১৯৭৬
- ১০। চর্য্যাগীতিকোষ - নীলরতন সেন - ১৯৭৮
- ১১। চর্য্যাগীতি পঞ্চাশিকা - সুমঙ্গল রাণা - ১৯৮১
- ১২। চর্য্যাগীতি পরক্রমা - নির্মল দাশ - ১৯৮১
- ১৩। চর্য্যাগীতিকা (বৌদ্ধগান ও দোহা) - সৈয়দ আলী হোসেন - ১৯৮৪
- ১৪। নব চর্য্যাপদ - ড. শশিভূষণ দাশগুপ্ত সংকলিত, ড. অসিতকুমার বন্দ্যোপাধ্যায় সম্পাদিত - ১৯৮৯
- ১৫। চর্য্যাপদ - জ্যোতিপাল মহাথের - ১৯৯০
- ১৬। বৌদ্ধ চর্য্যাপদ - এস এম লুৎফর রহমান - ১৯৯০

এছাড়াও পণ্ডিত মহল চর্য্যাপদকে নানা নামে উল্লেখ করেছেন। সেগুলির পরিচয় দেওয়া হল। এ থেকে চর্য্যপদের বৈচিত্র্য সম্পর্কেও ধারণা হতে পারে।

- ১) আশ্চর্য্যচর্য্যচয় - বিধুশেখর শাস্ত্রী - নেপাল রাজদরবারের পুঁথিশালার ক্যাটালগে এই নামটি আছে।
- ২) চর্য্যারদ - ড. প্রবোধচন্দ্র বাগচী - ১৯৩৮ সালে কলকাতা বিশ্ববিদ্যালয়ের ৩০নং জার্নালে এর উল্লেখ আছে।
- ৩) চর্য্যাগীতিকা - ড. অসিত কুমার বন্দ্যোপাধ্যায় - ১৯৫৯ সালের বাংলা সাহিত্যের ইতিবৃত্ত (প্রথম খণ্ড)।

এইভাবে দেখা যায় চর্য্যপদের নামকরণ বিষয়ে বহু পর্যালোচনা করা হয়েছে। কিন্তু 'চর্য্যাপদ' এই নামেই একাধিক গ্রন্থ সংকলিত হয়েছে। এই নামটি আসলে 'চর্য্যচর্য্য-বিনিশ্চয়'-এর লোক প্রচলিত সংস্করণ। এটাও ঠিক 'চর্য্যচর্য্য-বিনিশ্চয়' নামটি হরপ্রসাদ শাস্ত্রীর নিজের দেওয়া। কারণ

চর্যাপদের প্রকৃত নাম তিনিও পাননি। মূল পুথিটির মানপত্র (Title Page), সমাপ্তিসূচক টীকাকার ও লিপিকরদের পরিচয় (Colophon Page) পাওয়া যায়নি। গ্রন্থের আরম্ভে নান্দীবাচক শ্লোকে ‘আশ্চর্য্যচর্য্যচয়’ শব্দটি আছে। নেপালের জাতীয় অভিলেখায়ে (National Archives) গ্রন্থ তালিকায় ‘আশ্চর্য্যচর্য্যচয়টীকা’ (গ্রন্থ তালিকাঃ ১৯৯৪/৪১২, পরিবর্তিত ৪০১) লেখা আছে। পুথিটির বাইরের পাতায় নাগরী হরফে লেখা ‘চর্য্যচর্য্যটীকা’। প্রবোধচন্দ্র বাগচী পরবর্তীকালে এই পুথির যে ত্রিভুতী অনুবাদ প্রকাশ করেছিলেন সেটির নাম ‘চর্য্যগীতিকোষবৃন্তি’, সংস্কৃত টীকাকারের নাম মুনিদত্ত আর ত্রিভুতী অনুবাদকের নাম কীর্তিচন্দ্র। এবার হরপ্রসাদ শাস্ত্রীর দেওয়া ‘চর্য্যচর্য্য-বিনশ্চয়’ শব্দের অর্থ নির্ণয় প্রয়োজন হয়ে পড়ে। চর্য্য শব্দটি ‘চর’ ধাতু থেকে জাত। প্রাচীন অর্থ হিসেবে বলা যায় ভিক্ষুব্রতে অবস্থান করা। তারপর ধীরে ধীরে আচারমূলক উপদেশাত্মক ক্ষুদ্র ক্ষুদ্র কবিতা যা গানের মাধ্যমে প্রকাশ করা হত, সেগুলিকে ‘চর্য্য’ বলা হয়ে থাকে। এর অর্থ যা আচরণ করা উচিত। সুতরাং ‘অচর্য্য’ শব্দের অর্থ অনাচরণীয় অর্থাৎ যা করা উচিত নয়। বিনশ্চয় শব্দের অর্থ বিচারমূলক নির্দেশনা, অর্থাৎ নিশ্চিত করে নির্দেশ করা। কি আমাদের করা উচিত বা কি আমাদের করা উচিত নয় যা নিশ্চিতভাবে নির্দেশ করা হয় তারই অর্থ ‘চর্য্যচর্য্য-বিনশ্চয়’। হয়তো হরপ্রসাদ শাস্ত্রী এ ভাবনা ধরেই চর্য্যাপদের নামকরণ করেছিলেন ‘চর্য্যচর্য্য-বিনশ্চয়’।

কিন্তু মূল পুথিতে ‘চর্য্যচর্য্য-বিনশ্চয়’ নামটির উল্লেখ না থাকায় নামকরণ নিয়ে সংশয় দেখা যায়। আবার তিনি নিজেই ১৯১৫ সালে এশিয়াটিক সোসাইটি থেকে ‘A Catalogue of Palm leaf and selected papers MSS belonging to the Durbar Library, Nepal’ প্রকাশ করে দ্বিতীয় খণ্ডের তালিকায় এই পুথির নাম হিসেবে

‘চর্য্যচর্য্যটীকা’ উল্লেখ করেছিলেন। অথচ দেখা যায় ১৯১৬ সালে বাংলা সংকলন গ্রন্থ হিসেবে চর্য্যাপদের নাম দেন ‘চর্য্যচর্য্য-বিনশ্চয়’ ‘চর্য্যচর্য্যটীকা’র কথা আর উল্লেখ করেননি। তাহলে দেখা যাচ্ছে শাস্ত্রী মহাশয়ই বিভ্রান্তির মধ্যে ছিলেন এর প্রকৃত নামকরণ বিষয়ে। এই নামকরণ বিষয়ে মহামহোপাধ্যায় বিধুশেখর শাস্ত্রী প্রথম সন্দেহ প্রকাশ করেন। ‘Indian Historical Quarterly’ পত্রের ৪র্থ সংখ্যা (১৯২৮) তিনি বললেন মুনিদত্তের টীকার প্রসঙ্গ। সেই টীকা উল্লেখ করে বললেন — এই নামটি অধিকভাবে সাধারণ মানুষের কাছে গ্রহণযোগ্য। ‘পদ’ শব্দটি মূলত মধ্য মধ্যযুগের বাংলা সাহিত্যে অধিক প্রযোজ্য ছিল। বৈষ্ণব সাহিত্যের গানগুলিকে সাধারণত ‘পদ’ হিসেবেই উল্লেখ করা হয়। পদের মধ্যে গানের সুর থাকে। চর্য্যায় সঙ্গীতেরই প্রাচুর্য্য। কখনো কখনো সঙ্গীতই এখানে মুখ্য বিষয় বলে মনে হয়। কারণ পদগুলির প্রথমেই রাগ রাগিনীর নাম বলা হয়েছে। এখানে মোট ১৮টি রাগ রাগিনী আছে। পটমঞ্জুরী, গবড়া, অরু, গুজরী, দেবকী, দেশাখ, ভৈরবী, কামোদ, ধনসী, রামকী, বরাড়ী, বলাড্ডি, শীবরী, মল্লারী, মালসী, কছ গুজরী, বঙ্গাল, মালসী গবুড়া প্রভৃতি। এর মধ্যে পটমঞ্জুরী ১১টি পদের রাগ হিসেবে উল্লেখ রয়েছে। কারণ এই রাগটি সেইসময় বেশ জনপ্রিয় রাগ হিসেবে প্রচলিত ছিল। গানের মধ্য দিয়ে বৌদ্ধধর্মের চর্য্যার বিষয় ব্যক্ত করা হত। সেই হিসেবে একে ‘চর্য্যগীতি’ বলাও যুক্তিসঙ্গত। কারণ চর্য্যার মুখ্য বিষয় গানের মাধ্যমেই প্রকাশ করা হত। যাইহোক ‘চর্য্যগীতি’ লৌকিক নাম, এর উৎস খুঁজে পাওয়া দুষ্কর। সাধারণের কাছে এই নাম দিয়েই বেশ কিছু চর্য্যার সংকলন প্রকাশ করেছেন।

চর্য্যাপদকে অনেকেই ভাষার বিচারে ‘সন্ধ্যাভাষা’ হিসেবে উল্লেখ করে থাকেন। সেই হিসেবে এর নাম সন্ধ্যাভাষা বলে কেউ কেউ মনে করেন। স্বয়ং হরপ্রসাদ শাস্ত্রী এর ভাষাকে ‘সন্ধ্যা ভাষা’ বলেছিলেন। কারণ এর ভাষার অর্থ অস্পষ্ট।

কিছু বোঝা যায়, কিছু বোঝা যায় না। তাই তিনি বলেছিলেন – ‘সন্ধ্যাভাষার মানে আলো আঁধারি ভাষা, কতক আলো, কতক অন্ধকার, খানিক বুঝা যায়, খানিক বুঝা যায় না অর্থাৎ এই সকল উঁচু অঙ্গের ধর্মকথার ভিতরে একটা অন্য ভাবের কথাও আছে। সেটা খুলিয়া ব্যাখ্যা করিবার নয়। যাঁহারা সাধন-ভজন করেন, তাঁহরাই সে কথা বুঝিবেন, আমাদের বুঝিয়া কাজ নাই।’^৪ তবে ভাষার অর্থের দিক থেকে এর ভাষার নাম ‘সন্ধ্যা ভাষা’ হতে পারে। কিন্তু চর্যাপদের সংকলনটির নাম ‘সন্ধ্যা ভাষা’ হতে পারে না। এখনো পর্যন্ত এমন নামকরণ নিয়ে গ্রন্থ প্রকাশ হয় নি। সাধারণের কাছে ‘সন্ধ্যা ভাষা’ নামটি ‘চর্যাগীতি’ বা ‘চর্যাপদে’র সঙ্গেই উচ্চারিত হয়ে থাকে। তবে চর্যাপদের নাম হিসেবে লৌকিক নাম ‘চর্যাপদ’ বা ‘চর্যাগীতি’ গ্রহণযোগ্য হতেই পারে। কিন্তু চর্যাপদ সংকলনটিক প্রকৃত নাম মুনিদত্তের দেওয়া নামটিই গ্রহণযোগ্য বলে বিবেচিত হওয়া উচিত। কারণ মুনিদত্তের ঢীকা থেকেই হরপ্রসাদ শাস্ত্রী চর্যার গানগুলি সংগ্রহ করেছিলেন। আর সেই ঢীকার নাম সেহেতু ‘চর্যাগীতিকোষবৃত্তি’ সেহেতু এই নামটিকেই পণ্ডিত মহলের অনেকেই মেনে নিয়েছেন। তবু একথা বলতেই হয় ‘চর্যাপদ’ সংকলনের নাম যাইহোক না কেন আসলে লৌকিক নাম ‘চর্যাপদ’ই থেকে যায়।

উৎস পরিচয়:-

- ১। হরপ্রসাদ শাস্ত্রী (সম্পা), ৪৯ নং পদ, হাজার বছরের পুরাণ বাঙ্গালা ভাষায় বৌদ্ধগান ও দোহা, বঙ্গীয় সাহিত্য পরিষৎ, কলকাতা, ১৪২৫ বঙ্গাব্দ, পৃ-৭৩।
- ২। হরপ্রসাদ শাস্ত্রী (সম্পা), মুখবন্ধ, হাজার বছরের পুরাণ বাঙ্গালা ভাষায় বৌদ্ধগান ও দোহা, বঙ্গীয় সাহিত্য পরিষৎ, কলকাতা, ১৪২৫ বঙ্গাব্দ, পৃঃ ৪-৬।
- ৩। হরপ্রসাদ শাস্ত্রী (সম্পা), চর্যাচর্যা-বিনিশ্চয়, হাজার বছরের পুরাণ বাঙ্গালা ভাষায় বৌদ্ধগান ও দোহা বঙ্গীয় সাহিত্য পরিষৎ, কলকাতা, ১৪১৫ বঙ্গাব্দ, পৃঃ-১
- ৪। হরপ্রসাদ শাস্ত্রী (সম্পা), মুখবন্ধ, হাজার বছরের পুরাণ বাঙ্গালা ভাষায় বৌদ্ধগান ও দোহা, বঙ্গীয় সাহিত্য পরিষৎ, কলকাতা, ১৪২৫ বঙ্গাব্দ, পৃঃ-৮